

遺山先生文集

二



遺山先生文集卷第三十五

記

威德院功德記

并州唐以來圖經所載佛塔廟處眎他郡爲尤多
宣政之季廢于兵者凡十之七曾不百年瓦礫之
場金碧相望初若未嘗毀者浮屠氏之力爲可見
矣威德院在晉陽白馬川之清寧社治平二年賜
名國朝皇統初里耆老殷元命梵嚴寺僧善信及
其徒真果主之寺之廢久矣柱礎之外無復餘物
真稍葺堂屋以居大定中真之徒明玘嗣院事頗

以寺基迫隘爲嫌行視寺後平崖其上可剡治乃
乞地于韓順家而得之凡役工五千有奇而寺加
廣實倡于韓厚而僧因爲之勤也玘初刻華嚴經
本數年迨是而成回大作水陸以新經千部施且
燒二指爲供誠意堅苦爲人感動韓厚者與其屬
更爲起東西堂繪像備焉寺外直汾流爲木石橋
以便徃來然後寺事成玘爲予言如此且彊予記
之玘今老矣予嘗見其持律嚴入理深護念所業
如捍頭目盖人有不可及者每竊嘆焉淳屠氏之
入中國千百年其間終廢而旋興稍微而更熾者

豈無由而然天下凡幾寺寺凡幾僧以鄉觀鄉未必皆超然可以為人天師也唯其生死一節彊不可奪小大一志牢不可破故無幽而不窮無高而不登無堅而不攻雖時有齟齬要其終則莫不沛然如湍流之破隄防一放而莫之禦也道則異術也教則異習也梯空接虛入神出天與吾姬孔氏至列爲三家儒衣冠之子孫有奔走而從之者況乎誘庸俗而役之以爲區區之塔廟豈不謦咳噉呻之頃而得之噫使吾聖人之門有若信若果若因若玘者旦旦如是世世又如是就不能推明大

道卓如日月之明至于一畝之宮亦何遽有鞠爲園蔬之嘆乎吾于是乎有感

竹林禪院記

竹林寺在永寧之白馬原其初爲佛屋居人以修香火之供既廢矣鄉豪麻昌及其族弟岳稍完葺之以龍門僧廣居焉廣解梁人自言白雲杲之徒居而安之即以興造自任興定中請于縣官得今名乃爲殿爲堂爲門爲齋厨爲庫廡凡三年而寺事備南原當大川之陰壤地衍沃分流支貫嘉木高蔭良穀美稷號稱河南常杜而寺居其上游東

望女几地位尊大居然有岳鎮之舊偃蹇刳立莫
可梯接僊人諸峰顏行而前如進而侍如退而聽
如敬而慕如畏而服重岡復嶺絡脉下屬至白馬
則千仞突起朗出天外儼然一敵國之不可犯金
門鳥啄奔走來會小山纍纍如祖龍之石隨鞭而
東雲烟杳靄濃淡覆露朝窓夕扉萬景岔入廣一
攬而洛西之勝盡盖嘗嘆焉佛法之入中國至梁
而後大至唐而后固寺無定區僧無限負四方萬
里根結磐玄地窮天下之選寺當民居之半而其
傳特未空也予行天下多矣自承平時通都大州

若民居若官寺初未有閑麗偉絕之觀至于公宮
侯第世俗所謂動心而駭目者校之傳記所傳曾
不能前世十分之一南渡以來尤以營建爲重百
司之治或僑寓於編戶細民之間佛之徒則不然
以爲佛功德海大矣非盡大地爲塔廟則不足以
報稱故誕幻之所駭堅苦之所動冥報之所讐後
福之所徼意有所嚮群起而赴之富者以貲工者
以巧壯者以力咄嗟顧盼花草萊爲金碧鐘磬擊
鼓列坐而食見于百家之聚者乃如此其說曰以
力言者佛爲大國次之吁可諒哉正大庚辰予間

居空上廣因進士康國仲寧以記請仲寧爲予言
廣業而專心通且喜從吾屬游其進也有足與之
者因爲記其事并著予之所以感四月望日前內
鄉縣令元某記

少林藥局記

少林英禪師爲余言昔青州辨公初開堂仰山自
山下十五里負米以給大衆其後得知醫者新公
度爲僧伴主藥局仍不許出子錢致羸餘恐以利
心而妨道業新歿繼以其子能二十年間齋厨仰
給而病者亦安之故百年以來諸禪刹之有藥局

自青州始興定末東林隆住少林檀施有以白金
爲百年齋者自寇彥溫而下百家圖爲悠久計乃
復用青州故事取世所必用療疾之功博者百餘
方以爲藥使病者自擇焉僧德僧浹靖深而周密
又廉于財衆請主之故少林之有藥局自東林隆
始局事之脩迨子三年矣子幸以文記之予以爲
醫難事也自岐黃盧扁之書而下其說累數十萬
言皆典雅淵奧本于大道之說究乎死生之際儒
者不暇讀庸人不解讀世之學者非不藝專而業
恒至終其身有不免爲粗工者其可爲難矣佛之

徒方以禪定爲習于世間法皆以爲害道而不敢
爲間有言醫者特儒者之談禪爾有能了知味因
斷除病本如予之書所爲大醫王者乎謂之專則
不可也勞則辭久則厭不合則離泛然而來悠然
而往其視粥魚齋鼓如傳舍中物而不留顧其肯
老歲月于參朮間乎謂之恒則亦不可也不恒不
專取未必甚解而付之司命之事病者何賴焉故
廉者取之付一而有餘治藥不得不良十愈一人
千愈百人蓋猶有所望也貪者爲之乾沒而不定
治藥不必皆良尅床而當靡蕪齏芻而亂人參昌

陽而進猗苓飛廉而用馬薊佐使之異用畏惡之
相攻其禍可勝言哉古語有之良醫之不能以無
藥愈疾猶良將之不能以無兵而制敵也兵有形
有形則易見善用之者能以殺人者生人藥之性
難窮難窮則不善用之者反以生人者殺人可不
懼哉今子則不然若德若浹之實與廉皆選之十
百輩有不可得者子固得所任矣時節州土無不
適其當炮炙生熟無不極其性德與浹固亦盡其
伎矣雖然吾恐他日有不善其後者出人將曰藥
局之壞自某人始未必不以予爲知言也故備述

之使來者監觀焉

壽聖禪寺功德記

萬壽長老僧洪倪暨子皆河東人今年夏予來燕
城知師主壽聖也將往過之師遣侍者致參承云
三四年以來常欲走書幣太原有請于吾子幸今
至矣稅駕于我可乎予欣然從之他日問所求師
曰無他惟丐文以記寺事耳請具道所以然蓋此
寺即崇孝道場之佛位崇孝在大定明昌間堂宇
百楹食指以千記義學諸師迭主講席神州天府
非無聞剎擬量人境或自視缺然自遭離兵變城

邑廢毀僊佛所廬僅有存者崇孝佛位掃地而盡
獨曹王所建舍利塔巋然而已荆棘瓦礫地鼯來
舍如是十數年無留盼者有大檀越劉師彰之夫
人鄭氏篤于奉佛憫福地之久廢也願爲興起之
且其伯男子有廢孩幼喪明誓徒佛陀以爲歸宿
乃捐奩中物直百千金者合報心寺提點僧潤共
爲營度潤資性堅忍有立事之望初起大殿築室
其旁以爲釋子棲息之地此寺之初基也歲丙午
禪律諸人猥以第一代見請侃不敏洒掃于此者
十寒暑矣今廊廡齋厨下迨庫廩粗有處所而其

大較出於鄭之喜捨潤之力贊者爲多初慶事康
休大士聰聰爲授記有根塵有礙僧寶可依挽迴
佛日暗室生輝之語以倪觀之豈寥休以鄭哀其
子之廢不暇他及願力雖堅法施未溥故就其聲
聞狹劣而言之耶所以者何我以大堅固力起妙
莊嚴聚化朽壤而金碧奮蟄戶而鸞飛煥若神明
頓還舊觀于我法中塔廟所在即爲有佛望之而
塵勞破即之而智慧生耳目見聞方有是理夫劫
濁諸生積爲黑闇叢林之所障蔽如今以百千日
熾盛光而照臨之願豈以一室生白而爲究竟哉

況乎天雲借潤展庭三請昔而崇孝今別爲壽聖
其鳳諾錫之美稱龍光廓其徧照上資神壇之護
中寓華封之祝金輪四照與天無極豈惟佛子之
所贊嘆乃至齋鼓粥魚亦皆以一音演說固可以
著金石垂永久時節因緣繫吾子是待幸有以贊
就之子捧手曰有是哉興建本末當如師所請若
佛法則師當爲子說而予不當爲師說異時有大
居士文章翰墨如竹谿党公者出必能以華嚴偈
重宣此義云師道行清實臨事詳雅初受具王山
參枝足清和尚聞萬松道價裹糧千里以巾侍自

誓松一見即以座元慶之承事十五年備極勞苦
他人無與此者出世住萬壽荒廢以父無幾何爲
之一新之戒大會雖出于國力所以成勝緣者師
有力焉年月日元某記

興福禪院功德記

興福禪院在登封醴泉鄉之西保其初檀越鄧智
進買地于蔣整家築佛屋其上請少室清涼僧淨
文居之正大中以恩例得今名自是土木有加焉
予居崧前往來清涼如吾家別業自第一代琇公
而下若草堂德山主通西溪相與相之徒顯靖雋

諸人皆有道行可紀故嘗稱述之予赴召京師通
與顯偕智進來謁文以記此寺經度之始予諾之
然以趣裝未暇也是後得官東南迄開興之兵不
三四年諸師皆已下世至于興福之事則未嘗不
往來于心也丁酉之秋見淨文于山陽蓋自河南
歷大名東平訪予而及之謂予言喪亂後兩寺幸
存千里之來尚欲成諸師之志以無忘鄒氏耳予
欣焉爲記之且告之曰清涼在兩山間初無所知名特以
名德所在故齋鼓粥魚之聲殷然山谷間至今爲耆
名剎境用人勝真不虛語今興福與子俱脫兵劫